

2 Pita

1 ¹Ŋai Saimon Pita, Jesus Kristus san urat tamol agod ŋai iŋsan aposel. Tamolpein a iŋsad ilo rumok siŋaokan, nek maŋsama ago mi amaiak, iŋsad na girek en ŋigane ipalu da. Ilo rumok e ŋai niŋen o ŋabol den man Tubun en Jesus Kristus, idsad binawek, an iŋsan na diŋane ya. Iŋ itaot mok an niŋen o ilo rumok an ipidinai a. ²Ŋai aŋ niŋemi wo Anut ŋugudani dak, aŋ ilom lo Anut iŋ Jesus idsad Tubun en da aloŋ uyanan, an lo iŋsan maror iŋsan ilo panek aŋ bubem lo ka iganep awan isa wa.

Aŋ a Anut ipilianan an dabai apani wa

³Id iŋ taloŋ amaiak niŋen o, Anut san dabai tubun ak Kristus lo yen dan niŋen o, id an lo ibinawad go mel fidian kumaed san, agod id Anut san kagin tiri san dam ipanad a. Iŋsinanen yaŋak tubun ak lo agod kagin uyanan ak lo melmel an tiŋane san niŋen o igiad a. ⁴Agod iŋsan yaŋak tubun ak, iŋsan kagin uyanan ak lo dam, iŋsan promis lak na igane idu yan ipanad a. Promis an id malad lo naon lak na geig di tubun a. Promis nek amaiak lo aŋ tan en san nun panek ka ariŋani wa, man dugo, ilo imasa san kagin an lo tamolpein nun ipidinai da, ak man gamu asol san dal ilasag yen da. Promis an lo dam, iŋsinanen bunun aŋ ilom lo igane yan lo aŋ dam nek ago amado da.

⁵Fun an niŋen o aŋ maeg aganep kagin uyan uyan en taida aŋ lo aganep dilasa wa, agop aŋanem ilo rumok da abate wa. Malan malan aŋanem ilo rumok, an kagin uyanan ak da abate wa. Tinin te kagin uyanan ak, an Anut uloŋ san maŋau da abate wa. ⁶Agod tinin te Anut uloŋ uyan san maŋau aŋ sem ulum am abi uyan san kagin da abate wa. Tinin te sem ulum am abi uyan san kagin, an atur sakar san kagin da abate wa. Tinin te atur sakar san kagin an, Anut san kagin ari san da abate wa. ⁷Agod tinin te Anut san kagin ari san an, turam muroum ilom apidinai san kagin da abate wa. Agod wadan man turam muroum ilom apidinai san kagin an, aenta niŋedi wo tubun mi amat dan san kagin da abate wa. ⁸Man dugo, aŋ Jesus Kristus idsad Tubun en aloŋ uyanan dan san kagin naok igo yak aŋ lo yen dop, iŋ pempem aŋ ilom lo itabusip tubun tap, an iganep aŋsam madok lo nuŋon ifu wa, agod aŋsam urat iŋ niŋen o agane dan mel kawan tia wa. ⁹Ak man talpein ta

kagin an iñsan bunun lo tia tap, iñ ibol tamol mala tia yak igo ya, tia, ibol tamol malan asau mi abañ ta ile na dak ago ya. Man dugo, talpein ago man iñanen aupasek imug an Jesus ipasi yaug ikok ilasa yan ilon iñaon a.

¹⁰Teig taog, fun amaiak ninen o Anut igian go tamolpein aenta lulunad lo ipilianan an, dabai apani wo urat wagai agane wa. An kagin an fidian ari uyanan tap, au adu san tia ya. ¹¹Ago dop saen an idsad Tubun en Jesus Kristus idsad patu pasek tamol san kagin panek aben an lo aladu wo dop man, malam dupare uyanan a.

Profet ru, girek lo yen dan san ninen

¹²Aria, gidad an mel fidian alon uyan go, gamu ru rumok en abig atur sakar dak bo man, nai ilog yen dak ago melmel an saen fidian fon nupupaian da. ¹³Man dugo, naisag ilog lo saen gamu nai tinig tan en lo numado den man gidad nai safulalek ru igo nupupaian da, an uyanan a. Ago dop an dam mel en san ilo sou man mi agane wa. ¹⁴Man ata wo? Nai nalon ak, milaen tiap nai tinig gigin na niganen wa. Jesus Kristus, idsad Tubun en mel an ikubiai nile la ya. ¹⁵An ninen o nai urat wagai niganen an lo saen nai tan en nibisei dop man, an pempem mel an fidian ninedi wo ilom ka isou dop amado wa.

¹⁶Saen man imug anjam na mupalu yan, man Jesus Kristus idsad Tubun en san dabai mukubiai ale ya. Agod nal ta lo gup iñ fon dabai anda imul tan na ipalu wan ninen o mabol alon a. Saen man mel a ninen o murupaian an dugo, mansiganema ilo sou lo ru sewak ak awan mubate dop lo mirawan o migane di? Tia geig a, man dugo, mansema malama nam iñsan naon lilaman, iñsan girager tubun an da isapudade dugo mile ya. ¹⁷⁻¹⁸Man dugo, saen iñ Bai Anut lo yanak tubun ak girager da iñane yan, man iñ da did gun an fufo mumado ya, ago dugo iñ ninen o Anut awan keit lo iwagin dugo malon a. Awak an san lilian iñsan na ipalug yanan yabisag yanak tubun ak ipani a. Iñ ibol, “En man naineg Nanug mok, naineg bubeg mok, iñ ninen o nai ilog tubun mi uyanan da.” Awak a kumaen panu log ipalu yan man malon a.

¹⁹Agod taida mi, gamu Anut profet adi sad ru an rumok dabai ipani panad a. An iñsad awad kagin apani tap, an uyanan a. Man dugo, iñsad ru an man nek ibol lam ta tidom tubun lo ided dugo abañ isapudade dak igo won a. Ago agane dop yaup salso idu wa, agod salso idu san boi tinan an bubem lo isida wa. ²⁰An ru en alon uyan, ru en tubun a. Ru fidian a girek lo profet awan lo ilasa dan man, profet an san ilo sou tia ya. ²¹Man dugo, ru a profet sad awad lo ilasa dan san fun mok man, tamol san ilo sou igo tia ya. Tia, Urgan iñsen profet adi ilod iduduwig ru a Anut san nag ipalu yan mi dubol ilasa ya.

Girek manau sewak adi iñsad kubulek

2 ¹Wagam na profet sewak wei mi Isrel tamolpein lulunad lo dilasa ya. Nek ago mi girek manau sewak ak wei mi an lulunam lo dilasa

wa. Inj pitejanek sewak a imianuk an mi dijanep midaenj lulunjam lo diladup dupananj a, an lo anjam ilo rumok an dukubuli wa. Agod Tubun en injen girek manjau sewak adi an idad injiliai a, ago bo man inj patud dupani wa. Kagin an lo inj milaen tiap daonj dijanane dop diau dudu wa. ²Inj jeit kagin an ta saian na ago dubol a, an lo ilo rumok tamolpein wei kasik kagin an diganuri wa. Fun an ninjen o tamolpein aenta rumok san dal an saian dupani wa. ³Tamol naok an inj sad ilo sou moni ninjen o man tubun kasik a, an lo ru sewak nam nudum dusue dop anjanem moni dijanane wa. Anut inj sad naok naok an wagam mi ile ya, agog injaned muruan an ikubune pidinai la ya. Muruan an dal na ipalu da, ago dugo inj sad daonj an dam sumeikan mi yen da.

⁴Aloj o uyanan a. Gubak mi enjel aenta au dupas, ago gug Anut inj sad aupasek an injaneg gigin na ta igane na ya. Tia, inj enjel an tan paen na gib ilon tidom tubun ak lo isubanaig idirai diau a. Ate dumado yaup bitinaek nal ilasa wa. ⁵Agod taida mi, tamolpein a wagam na Anut san kagin ta duri dupani na yan sad aupasek lo ta yilfu onj na ya. Tia, fidian lom tubun geig ak injal dugo Noa mi imado ya. Tamol kisaek an iwon agod muroun ⁶an dida Anut ninjedi wo ilon isou a. Man dugo, Noa inj kagin itaot ak san bulaluj tamol. ⁶Agod taida mi, Anut Sodom inj Gumora da sad tamolpein fidian ifu yau a. Yai ui onj iwatik go inj sad panu tubun an inani yau itout a, agod tamolpein dam fidian inanai pasik a. An lo inj sad mitilaen an tamolpein fidian gamu Anut san kagin ta duri dupani na dan dile dop, inj lo dam kulob ago ilasa wa. ⁷Agod taida mi, Lot inj tamol itaot a, agod Anut daonj an lo patun ipasi a. Inj tamolpein kagin saiak saiak digane dan ileg ilon tubun mi muruan a. ⁸(Man dugo, tamol itaot a lulunjad lo nal fidian imado dan, inj kubiaenj dipilali dan san kagin sensen an ile dugo inj sad ru saiak saiak an dam ilonj se ya. Kagin ago an ilon imoi da.) ⁹An rumok tap, Anut muruan funfun dugo yak lo tamolpein a Anut san kagin duri dupani dan patud ipasi san ilonj a. Nek ago mi inj tamolpein saiadi muruan lo idiraip dumado wan bu panek an paen na mi dumado dop yaup bitinaek nal ilasa san, an dam ilonj a. ¹⁰Lulunjad lo tamol a ilo masa san kagin diri dupanig lo sed nun ipidinai dugo, gurman awad paen na dumado wo dumoi na ya, tamol naok ago yak Tubun en ninjedi wo tubun geig imoi a.

Tamol naok ago yak silei tinadi agod kabunjadi dababai a. Inj enjel adi kumaen panu lo dumado dan dumisilanai o ta direr na da. ¹¹Ago gug enjel Anut naon na dutur dan inj sad dabai girek manjau sewak tinadi an irijanai a, ago bo man inj tamol an bitinaek lo dumisilanai san ago ta didirai na da. ¹²Tamol an melmel a ta dulonj na yan ninjedi wo dijinjen saian da. Tamolpein naok ago man nek ibol bor gown onj, inj kankan amad tia ago dutor da, dilasa san fun man talpein duburou idup dufu dumat san ago mi a. Girek manjau sewak adi an nek ibol bor gown onj inj dam daonj dijanane wa.

¹³Girek manau sewak adi a muruan aenta dipidinai an lo in dam naon dile wa. Adian in tinid dugo urat dupani man ago digane da, an insad yousai. In baob nun anda yak igo ya. Agod in tamol uyadi on an dida anan ani da. Gug gigin na man kagin saiak saiak an lo dumado da. ¹⁴In jeit pein adi mi dil o dumat da. Aupasek o mi nal fidian yaes isofutanai da. In pein adi a ilod gidigheid an ilod dijanep jeit kagin san dal duri da. In mala sek lo man ibilem adi a, agod in pitiñinek a Anut ipidinai an san nanuk adi mok a. ¹⁵In dal itaot ak dubiseig sen diau geig a, agod in Beor nanun Balaam gubak mi yau ago diau da. In kagin saiak saiak iganep naon moni inane wo mi imat da. ¹⁶Ak man insan aupasek san kudo bek ru an ilon a. Man dugo, donki inijen san tia gug tamol awan lo inijen ilasag profet an san njeo kagin an yabituani a.

¹⁷Tamol naok an sad kagin nunon aman tia ya, nek ibol you igos yau ak on, tia, in ibol ui idu wo tim taen gigin na itumanig yen dugo tim iwi yang ui tia yak igo ya. Anut inaned aben tidom tubun geig ak lo tan paen na ikubuneg yen da. ¹⁸In awad ru tutubun mi dubol da, ago gug insad ru an nunon aman tia ya. Insad ru lo tamolpein a saen milaen tiag aupasek adi sad na dusol diau an ilod dijane da, an lo tinid imasa dop lo jeit kagin digane da, agod tinid san kagin saiak saiak aenta dam digane da. ¹⁹Girek manau sewak an mel ta isubanai san tia ago dutor san ru dubol pidinai a. Ago gug insedi man kagin saian ak san bigabeg dumado da. Man dugo, mel dugon tamol yabituani dan, nek in mel an san bigabeg imado da. ²⁰Man dugo, in imug Jesus Kristus idsad Tubun en, agod idsad binawek an dulon a, manau an lo tan en san nun kagin san na dusol diau la ya. Ak man in afon dumul kagin saian ak lo diladug isubanai tap, insad wadan gamu en san man saian mok, agod insad naon gubak mi an san irinani geig a. ²¹In kagin itaot an san dal kitek ta dulon na yak man, an uyan a. Man dugo, in insad Tubun en awan lo kubiaen gun ak ibol dulon dugo dijane, ago gug an patud dupanip dal an dibisei tap, an saian geig a. ²²Ru mitilaen uraru en rumok in ninedi wo ibol da, “goun ilu gug imul yang insinanen ulu an fon yani da,” taida mi, “bor you isug la gug fon yang gigeo lo ibubulam da.”

Tubun en imul ipalu san nal

3 ¹Turag muroug, en naisag girek turanein nigireg ansam na nigane ipalu ya. Nai girek uraru nigire en lo ananem kankan itaot nufufunip ilo sou uyanan ak ipanaj san a. ²Kankan en igo ya. Ru a profet gun adi wagam mi dubol na yan, agod ru kubiaen a ansam aposel adi awad lo ansam bunawek Tubun en ibol panaj an dam ilom isou wa.

³Mel en inug alon o nmat da. Nal wadan dilasa dan san saen lo dop tamolpein ansam ilo rumok en kukok an digane san dilasa wa. In Tubun en san ru nijen o disel a, agod ilod imasap mel dugo digane wo ilod ibol

an mi duri da. ⁴In igo dubol, “In imul ipalu san ibol panar an san nuron dugon te yen di? Man dugo, gubak mi mansama tamama dumat dugo ipalug gamu en mel fidian ta ibileksa na ya. Tia, fun lo ipalug gamu en nek ago mi yen yau da.” ⁵In melmel a Anut wagam idirai an ilod inaron o digane ya. Melmel an man, Anut anen ru lo keit wagam mi ilasag yen da, agod inisan ru lo you inaneg nam tan igane ilasa ya. ⁶Agod you an lo mi lom tubun ak ilasag tan fidian ituanig saen an san tamolpein fidian itarmunaig ipitiinai a. ⁷Ak man ru an lo mi keit in tan da gamu e dien den Anut gigin na idirai a. Ago dien yaup yai lo idiraip imiriai a. Nal a mel en ilasa wan man Anut san bitinaek nal, saen an lo Anut tamolpein a inanen kagin ta diganuri na yan ipitiinai a.

⁸Ak man nai teig muroug, mel kisaek en ilom ta inaron na wa. Tubud malan lo nal kisaek man ibol anarar wan tausen ak igo ya, agod anarar wan tausen man ibol nal kisaek ak igo ya. ⁹Aenkadi Tubun en mel igane wo ibol gug saen ibidani dak abol da, gug in tinin saen bidanek an tia ya. Man dugo, in mos nam ilian da, ta an lulunam lo ideg yau man imoi a. An nigen o an ilom abileksap in o ilom rumok an nigen o saen ipanar da.

¹⁰Ak man Tubun en san nal man nek ibol gumagam tamol igo won ipalu wa. Nal an lo dop pitiinek san liliin tubun geig ak ta ilasa dop keit itout yau a. Agod yai lo mel fidian you on ibilip itout yau a. Agod tan en in tamolpein sad kagin naok naok an fidian da kuai te dilasa wa.

¹¹Aria, Anut kagin an lo mel fidian ipitiini tap, an tamolpein naok dugo won alasa wak i? An kagin gun ak mi agane wa, agod Anut san kagin ari apani dop amado wa. ¹²Dal an lo Anut san nal tubun ak ipalu san nigen o mala nouk amado wa, ago dop ansam kagin uyan ak lo nal an ilasa kisaek on o agane da. Nal an lo Anut yai ituni dop keit inanip itout yau a, agod yai an mi tan en igane imatal pe you on ibilip itout yau a. ¹³Ak man id a ilod lo rumok an promis a Anut ipanad an lo keit foun ak, tan foun ak dam tile wo mala nouk tumado da. Agod tan foun an ilon lo man kagin itaot ak mi ate yen yau a.

¹⁴Nai turag muroug, fun an nigen o saen Tubun en ipalu wo mala nouk amado dan, an baob amam tia, nun amam tia yak, agod nugug lo ilo maror amado dan lo dam, in ago ilian san nigen o urat wagai agane wa. ¹⁵Agod idsad Tubun en mos kagin e ipanar den nigen o igo ilom isou, an in patu pasek anane san saen ipanar dak abol a. Idsad turad mok Pol dam in Anut manau ipani an lo girek naok en taida igireg ipanar a. ¹⁶Insan girek fidian lo ru naon nek ago mi igire idug nigen o mi ibol na ya. Insan girek an lo mel aenta id talon uyan san muruan kitek yen da. A ilod tia yan, ilod gidigheid ak insed dideg diau san, ru an dukubuli da, nek ibol girek gun ak aenta lo dam digane dak ago mi a. An lo sed ipitiinai da.

¹⁷Turag muroug, an mel en alon la ya, fun an nigen o an kagin agane wa. Kabelan tamol saiadi ak sad aupasek an ilom inanep, an atur sakar

san abi dan banim ibisawaip au adu banau. ¹⁸Gug anj idsad Tubun ak Jesus Kristus idsad patu pasek an san ilo panek, inj alonj uyan san anj da atabulsi wa. Id inj yanan tabisa dan lo gamu girager anda imado da, ago mi yen yaup kumaen pempem san nal ilasa wa. Rumok.